

Cu hopi entusiasmo Pader Jairo Maduro a saca prome edicion di e corant di su parokia

ORANJESTAD (AAN) – Parokia di Brazil a produci su prome edicion di su corant. Den entrevista cu Matutino DIARIO, Pader Jairo a elabora riba e iniciativa bunita aki.

Pader Jairo Maduro a menciona cu e ta gusto asunto di media. Pesey via canal 13 e ta transmiti un Santo Sacrificio di Misa, y e ta spera cu pronto lo por hacie via e otro canalnan di television tambe.

Pader Jairo Maduro a menciona cu el a bin na e idea cu un corant ta bon, y ora el a bay cu vacacion afo el a bishita e Diocesis di Laredo,



el a ripara cu tur siman nan tin un boletin, cu ta consisti di un pagina dobla na dos.

E ora a surgi e idea pa e bin cu un corant di 16 pagina, y despues di a consulta cu diferente persona cu a dune algun idea, a bin saca e prome edicion aunke tin detayenan tecnico chikito cu no a bay



cien por ciento.

Pader Jairo a señala cu den e corant tin varios mensahe



y lo tin mas hende cu kier participa skirbiendo den dje, y ta asina cu Iglesia semper ta uza e medionan di prensa. Tin

un corant di Iglesia Catolico yama "Observatorio Romano" cu ta di Roma y e no ta yega na Aruba sino cu mester abona na dje. Pader Jairo a menciona cu si tur Iglesia ta haci mescos di tin su corant e lo ta hopi bon.

E sacerdote a agrega cu kizas den futuro e lo uni na otro pastornan pa nan edita un corant pa henter Aruba envez di ta un parokia so, y e ora ey nan tur ta pone contenido den dje. El a subraya cu hopi cos por haci cu e tipo di publicacionnan aki, pasobra semper ta bon pa tin material den man, di lectura, meditacion, storia, etc.

Pa aworaki e corant lo sali un biaha pa luna y si tur cos bay bon lo hacie dos biaha pa luna, y si e bai hopi hopi bon e por sali tur siman tambe.

Pader Jairo Maduro a menciona cu aworaki e ta por nada pero lo pone un envelop den dje, pasobra tur ayudo ta bon. Awendia berdad nada ta por nada y nos tur mester colabora pa cosnan asina por draai. Si cada uno ta aporta su granito di arena tur cos ta posible riba e mundo aki, na Aruba y tur caminda.

Pader Jairo Maduro a subraya cu tin hopi informacion den e parokia pa publica den e corant. Ora el a cuminsa skirbi el a bisa cu mehor ta stop, pasobra tin tanto material pa publica pasobra e ta tuma tempo. E ta skirbi anochi te madrugada. El a tene cuenta cu e grandura di leternan pa su lectura ta confortable pa un y tur.

Pader Jairo Maduro a agrega cu e ta uza hopi potret bieu den e corant, di su mes parokia y di otronan tambe. E lo saca potret di actividadnan grandi di su parokia pa publica nan tambe. Hendenan ta gusta wak nan mes den potret, Pader Jairo Maduro a menciona.